

Baluwa jha Pauli kwa Akaloma Ulongolelo

Kitabo cha Pauli kwa Akaloma kikajhandikwe na Ntenga Pauli muchaka cha makome nhwano na ncheche ade makome nhwano na nane kubhoke pukubhelukwa Yecho Kilichitu. Pauli anatyangi jhe ku Loma, yenio akatumite baluwa jhenje kwalaghii bhakilichitu bhu ku Loma, Akayahude na bhando bha ilambo henge. Akajhandike baluwa jhenje patamita ku muche gwa ku Kolintu. Pauli akajhandike baluwa jhenje kupala bhando bha ilambo yoha bhannyeketele na kunnyokanikiya Yecho Kilichitu mu chula jha 16:26.

Kitabo chenje cha Akaloma ndi kitabo chamaha hake kwa Akakilichitu bhoha, bha kila chehemo na bha kila ngongu nhwalo ijhandike hotuhotu na Pauli na ilonge ughombokeko ghutupata kwa ndela jha Yecho Kilichitu. Helahela Pauli hailombaniche Lilobhe lya Mbone lihyono na lela lya lilaghano lya makacho. Akachomi twe bhilonge nchatale ghuhujhema ngita nghomba mukitabo chenje ndi ghola ghubhii muchala jha 1:16 ghulonge, “Nikolejhe hone Lilobhe lya Mbone; ndi makakala gha Chapanga kwa ughombokeko, kwa kila mundo jwajheketela, kutumbulii hote kwa Akayahude na kubhoke penia kwa bhando bha ilambo henge.” Mu chula jha 1-12 jha kitabo cha Akaloma kibhii na mabholo ghamaha hake

na chula jha 13-15 ghabhii mabholo kwa Akakilichitu chibhapalwa bhatame.

Ghughabhii mukitabo

Pauli itumbuu baluwa jhake ngita chahyobhalile kukilangii jwenio ndi ghane na abhahandikila bhando ghane, mu chula jha 1:1-15.

Kabhele ijhandika kwa mundo chabhile na chahoto kughombokoka kupete Yecho Kilichitu, mu chula jha 1:16-11:36.

Pauli ilaghii Akakilichitu chibhapalwa bhatame, mu chula jha 12:1-15:13.

Pauli ijhomole na kwajhambucha bhando bhibhannyeketii Kilichitu bhu ku Loma, mu chula jha 16.

¹ Nenga Napauli, ntumiche jwa Yecho Kilichitu, na ntenga jhuhaghulilwe nu kukemwa na Chapanga kwa nhwalo gwa kwatangachii bhando Malobhe gha Mbone.

² Kuhumii makacho Chapanga akalaghile bhando, Lilobhe lende lya Mbone kupete milondole bhake mu Majhandiko gha Chapanga.

³ Lilobhe lyambone lende ndi lilonge malobhe gha Mwana gwa Chapanga, Bhambo gwito Yecho Kilichitu, jwenio kiyegha abhelwike kuumii mu lukolo lwa munahota nkolongwa Daude,

⁴ kwa uhuke gwake gwa Unyahinyahi, na makakala ghake gha kuyoka kwake kuumii kubhawile jwenio Yecho Kilichitu alangiwe kubhehe ndi Mwana jwa Chapanga.

⁵ Jwenie atupekii twenga umbone gwa kubhehe akatenga, twalongoche bhando bha ilambo yoha bhanyonikanikiye na kuntembekeya.

⁶ Mangota helahela ndi pakate jha bhando bheniya, bhuhaghulilwe na Chapanga mme bhando bha Yecho Kilichitu.

⁷ Ngohe, ninyandikila mangota mabhoha bhumitama ku Loma bhumpahilwe na Chapanga, na bhunkemitwe kubhehe bhando bhake bha nyahinyahi. Ninyope umbone na uteeke kuumii kwa Chapanga Tate gwito na Bhambo Yecho Kilichitu.

Uchengulo kwa Chapanga

⁸ Nitumbuu kuchenguu Chapanga gwango kwa ndela jha Bhambo Yecho Kilichitu kwa nhwalo gwino mangota mabhoha, kwa nhwalo gwa kihobholelo chino kijhokanikike nnema ghoha.

⁹ Nintumikii Chapanga kwa mwojho gwango ghoha kwa kutangacha Malobhe gha Mbone gha Mwana mundo, na jwenio ndi amanya chininkomboka mangota,

¹⁰ machiko ghoha puninnyopela. Ninyopa Chapanga anda apahile, nphoto kuntyangila.

¹¹ Nhwalo noghii hake kummongana na kubhaghana pamonga na mangota mota yampekii uhuke na kunkangamalicha mangota.

¹² Ndi nhwalo nilonge twabhoha tukangamalichane, kihobholelo chino nakingangamalicha nenga na cha nenga nakinkangamalicha mangota.

¹³ Makalongo bhango, mbala umanye naha, machiko ghamahela nikapahi kuntyangila, nambo ade ngoheno bhandei kuhibhilikiya.

Nipala bhando bhannyekete Chapanga pakate jhino ngita chibhannyeketii bhando bha ilambo henge.

¹⁴ Ngwete lighambo lya kwatangachii bhibhamanya na bhangamanya, na kwatangachii bhina malango na bhanga malango.

¹⁵ Kwa nhwalo gwenio nenga nipala hake kuntangachii Lilobhe lya Mbone kwino mangota hela hela bhumii ku Loma.

Likakala lya Lilobhe lya Mbone

¹⁶ Nilikole jhe hone Lilobhe lya Mbone, libhii na likakala lya Chapanga jha kwakombola bhando bhoha bhibhannyeketii, litumbuu kwa Akayahude, peniya kwa bhando bha ilambo henge.

¹⁷ Nhwalo Lilobhe lya Mbone lilangii hotu Chapanga chabhabhalangila bhando bhaumbone palonge jhake kwa kihobholelo, kuumii pukutum-buu ade kupehekeya. Ngita chijhandikwe mu Majhandiko gha Chapanga, “Mundo jwabhii jwaumbone palonge jha Chapanga natama kwa kihobholelo.”

Bhando bhoha bhina uhakaho

¹⁸ Kuhuma kunane kwa Chapanga ayekwii njwe lilaka lyake kwa uhakaho ghoha na gwanaganandela ghoha gwa bhando kwa bhala bhuhahibhilikiya uchakaka ukoto kumanyikana kwa ghanaganandela gwabhe.

¹⁹ Nhwalo ghighantenda Chapanga amanyikane kwabhe ghabhii mbegha, ndi Chapanga jwenie alangiye hotuhotu kwabhe.

²⁰ Kuhumii Chapanga papangina nnema, uhotolo gwake gwa machiko ghoha ghangapeta na Uchapanga gwake umanyikana mbegha ata ukoto kubhonekana kwa miho. Bhando bhahoto kumanya makakala ghake kwa ilebhe yapangine. Kwa gheniya bhakwetejhe kilebhe cha kukikengelela!

²¹ Pamonga bhaumanya abhii Chapanga, nambo bhanomba jhe ngita Chapanga jwabhe amu bhanchenguu ng'o. Nambo kuwacha kwabhe nga uwenje na miojho jhabhe ibhii mulubhendo tyoo.

²² Bhakiloka bheniya bhina malango nambo mandindilima.

²³ Bhaleka kunyinamila Chapanga jwatamikiya machiko ghoha ghangapeta, nambo bhahijhinamila inyagho ilandana na bhando bhibhawegha, ilandana na inyama na ijhune amu ihumbe ikwabha.

²⁴ Bhahe, Chapanga ajhakwaleka bhaikengame ilebhe yabhe ibhaipala ya luku kuhumii kumiojho jhabhe na bhatendelane ilebhe ya hone payegha jhabhe.

²⁵ Bheniya bhaughalambwie uchakaka gwa Chapanga kwa kulonge uwange, bhaijhinamila na kuitumikila ilebhe yapangine Chapanga, nambo bhakanombitejhe Jwapangina jwenio jwapalwa kulombwa machiko ghoha ghangapeta. Amina.

²⁶ Kwa nhwalo bhahenga gheniya, Chapanga ajhakwaleka bhaikengame tama mbajha ya hone. Hata akakeghe bhabhe bhalekite kugholoka na akangana bhabhe ngita Chapanga

chabhapangine, bhinoghelana bhene kwa bhene.

²⁷ Helahela akanalome bhalekite kugholoka na akahana bhabhe ngita Chapanga chabhapangine, bhinoghelana bhene kwa bhene. Bhatendelana ilebhe ya hone akanalome kwa akanalome, yenio makipalii bhene mang'ahe kwa malemo ghabhe ghibhateile.

²⁸ Kwa nhwalo bhando bhankanite kuumanya Chapanga kwa malango ghabhe, Chapanga abhalekite bhakengame malango ghabhe mabhoho, bhahengita ghala ghabhakanikiwa kuhenga.

²⁹ Bhando bhamba bhatwelii twe ubhoho ghoha, kukokotoka na kuponja ilebhe na wiho na kukoma na bhulo na lingele na lung'wenyo,

³⁰ bhibhakopokeya ajhabhe bhibhanchimwa Chapanga na bhina maligho na bhibhakikweya na bhibhaloka na bhibhapala kuhenga mabhoho na bhala bhangajhokanikiya akatate bhabhe,

³¹ bhakwete jhe malango na bhalenganikiya jhe chibhalaghine na bhakwetii jhe umbone ata kiya kwa bhando bhange.

³² Bhamanye kubhehe lilaghalikilo lya Chapanga lilonge bhando bhubbahenga mambu ghanga bhipala bhakomwe. Nambo bhahenga mambu gheniya chi nhwalo mambu gheniya tu, nambo helahela bhajheketelana na bhala bhibbahenga mambu gheniya.

2

Luhadabulo lwa Chapanga

¹ Makoche anda mwahadabuu bhando bhange, mihoto ng'o kukikengelela hilu mwe mma maghane. Nhwalo kwa pumuhadabuu bhando

bhange, kongo mabhene muhenga ngita ghala ghibhihenga bheniya, mukihadabula mabhene.

² Na twenga tumanye kubhehe luhadabulo lwa Chapanga kwa bhando bhala bhubhahenga ilebhe ngita yenio ndi luhadabulo lwa chakaka.

³ Nambo mwe makoche jhumahadabuu bhando bhala bhubhahenga ilebhe ngita yenio na kongo mwenga muhenga ghagha, bho, pimiambuka namulubhambala luhadabulo lwa Chapanga?

⁴ Amu pange muupucha umbone gwake nkolongwa gwa Chapanga na kuhimbilila kwake na kunolela tugha, bho, mihola jhe umbone gwa Chapanga ghunnongocha kuleka uhakaho na kung'alambukila Chapanga?

⁵ Nambo mwenga mina mwojho ghuku-jhundupa na mitaho gwa kuleka ulemo, yenio mukibheke lilundiko lya mang'ahe ngo gha lilaka lya Chapanga lichiko lela lya luhadabulo lwa chakaka pulupalwa kuyekulilwa.

⁶ Chapanga nanepa kila jhumo kwa chela chatehile.

⁷ Bhando bhala bhubhahenga ghaumbone changatotokela na kuupalaha ung'alicho gwa ichima na ughome gwa machiko ghoha ghangapeta, bhando bheniya Chapanga nabhapela ughome gwa machiko ghoha ghangapeta.

⁸ Nambo bhala bhange bhibhaking'ahikila bhene na kuhikana ilebhe ya chakaka na kuikengama yanganandela, chakaka Chapanga nabhahadabula kwa lilaka likolongwa.

⁹ Malagho na mang'ahe naghankolela mundo jhojhoha jwaitenda ghangananandela.

Naghatumbula hote kwa Akayahude na helahela kwa bhando bha ilambo henge.

¹⁰ Nambo Chapanga nabhapela ung'alicho, ichima na uteeke bhando bhala bhoha bhibhahenga ghambone, nabhatumbula hote Akayahude na helahela bhando bha ilambo henge.

¹¹ Nhwalo Chapanga intendela telatela mundo jhojhoha.

¹² Bhando bhala bhibhahenga uhakaho changa-
manya Lilaghalikilo lya Mucha, nabhahobholela
changa Lilaghalikilo, na bhando bhala bhibha-
tenda uhakaho kone bhalimanye Lilaghalikilo lya
Mucha, nabhahadabulwa kwa Lilaghalikilo.

¹³ Nhwalo chi bhala bhibhajhoha Lilaghalikilo
bhaumbone palonge jha Chapanga, nambo ndi
bhala bhibhajheketela Lilaghalikilo ndi bhabha-
langilwa bhaumbone palonge jha Chapanga.

¹⁴ Bhando bha ilambo henge bhakwete jhe
Lilaghalikilo lya Mucha, nambo pibhahenga
telatela ngita chilipala Lilaghalikilo lya Mucha
bhakilongochwa na miojho jhabhe, bhene
nabhabha na Lilaghalikilo nkate jhabhe kone
bhene bhakwetii jhe Lilaghalikilo lya Mucha.

¹⁵ Nhwalo bhalangii kubhehe ghighapalwa na
Lilaghalikilo lya Mucha ghajhandikwe mu miojho
jhabhe. Uhotolo gwabhe gwa kumanya ghamaha
na ghangandanela ghalangii kilebhe chenje ndi
cha uchakaka, nhwalo mawacho ghabhe ghi-
langii kutakalila amu ghankengalile.

¹⁶ Gheniya naghapitila lichiko lela Chapanga
pahadabuu mambu gha chile gha bhando kwa
ndela jha Yecho Kilichitu, ngita Lilobhe lya Mbone

leno lindsayacha chililongela.

Akayahude na Lilaghalikilo lya Mucha

¹⁷ Bho, mwe? Mabhehe mukikema Akayahude muhobholela Lilaghalikilo na kukiloke kubhehe ndi mabhando bha Chapanga,

¹⁸ umanye chapala Chapanga na nhotwii kuhaghuu kilebhe chamaha nhwalo Lilaghalikilo libhola,

¹⁹ mwenga chakaka mukitenda mwalongocha bhando bhala bhagalola na lumule kwa bhando bhibhabhii mulubhendo,

²⁰ mabhola mandindilima na bhando bhamela bhanabholeka jhe. Nhwalo kuhumi Mulilaghalikilo umanye chakaka mambu gha kumanya na mambu gha uchakaka.

²¹ Mwe mabhola bhajhino, bho, nhwalo gwa nike mukibhola jhe mabhehe? Matangachii bhajhino bhakotoka kujhibha, nhwalo gwa nike mabhehe mijhibha?

²² Mwenga milonge bhando bhakoto kuhenga ngongola, bho, nhwalo gwa nike mabhehe mihenga ngongola? Mwichimwa inyagho ya ichapanga, nhwalo ghane mabhehe mujhibha munyumba jha inyagho?

²³ Mukiloke Lilaghalikilo lya Chapanga, bho, nhwalo gwa nike mabhehe mupucha Chapanga kwa kuleka kukamu Lilaghalikilo lyake?

²⁴ Ngita hela chighalonge Majhandiko gha Chapanga, “Bhando bha ilambo henge bhalilighite liina lya Chapanga kwa nhwalo gwino mangota Akayahude.”

25 Kujhingii jando nakubhaha kwambone anda mulijheketile Lilaghalikilo, nambo anda mulitwekwile Lilaghalikilo, milandana na mundo jwangajhingii jando.

26 Anda mundo jwangabhehe Uyahude jwangajhingii jando anda atehi chilipala Lilaghalikilo, bho, Chapanga namalangilaj he ajhingii jando?

27 Mundo jwangabhehe Uyahude jhola jwangajhingii jando jha yegha, nambo ikamula Lilaghalikilo nabhahadabula mangota Akayahude nhwalo milikamuu jhe Lilaghalikilo, pamonga nakubhehe na Lilaghalikilo lilijhandikwe.

28 Nhwalo Akayahude bha chakaka chi bhala bha panja tugha, amu kujhingii jando hilu chi ilebhe ya panja jha muyegha tugha.

29 Nambo Akayahude bha chakaka ndi bhala bhabhii Akayahude chankate, bhala bhabhijhingii jando jha umwojho gwake. Lihengo lende ndi lihengo lya Uhuke gwa Chapanga, chi kilebhe cha Lilaghalikilo chikijhandikwe. Mundo ngita jwenio nalombwa na Chapanga, na chi bhando.

3

1 Bho, Uyahude achochite nike kuliku bhando bha ilambo henge? Na bho, kujhingii jando ndi kilebhe kikolongwa?

2 Chakaka, kibhii cha kujhambulila kwa kila lubhoko! Chukutumbula Chapanga akabhamwiye Akayahude lilobhe lyake.

³ Nambo tulongela nike bhangе pakate jhabhe bhanhobholela jhe Chapanga. Bho, kilebhe che-nie nakintenda Chapanga akoto kuhobholeka?

⁴ Nahi jhe! Chapanga nahobholeka, pamonga na kila mundo uwange ngita chighalonge Majhandiko gha Chapanga,

“Kila pumulongela malobhe ghino ghabhaha gha chakaka,

na pumuhadabula, mwenga milongocha.”

⁵ Nambo kwa gwanganandela gwito ghutuhenga Chapanga abhonekana ahenga mbone, bho, ngohe natulongela nike Chapanga akwete ulemo anda atuhadabwii twenga? Pamba nilonge kwa kuwacha kimundo.

⁶ Nahi jhe! Ngaibhii yenio Chapanga ngahotwi bhole kwahadabuu bhando bhoha bha pannema?

⁷ Pange mundo jhonge ihoto kulonge naha, “Anda kwa uwange gwango ujhonjekeya uchakaka kwa Chapanga na ung'alicho gwake, bho, nhwalo ghane nihadabulwa anda mmii na uhakaho!”

⁸ Nhwalo gwa nike tulonge jhe, “Deka tuhenge ghanganandela ghahike ghambone?” Bhando bhangе bhakannighite nabhahadabulwa chiipalwa.

Abhii jhe jwaumbone palonge jha Chapanga

⁹ Bho, ngohe tulonge nike, bho, twenga Takayahude ndi bhamaha kuliku bhando bhangе? Nahi jhe! Ngita punikalongolile kunnobholela njwe Akayahude na bhando bhangе bhoha bhabhii na uhakaho.

10 Ngita chighalonge Majhandiko gha Chapanga,

“Abhii jhe hilu jhumo jwabhii jwaumbone!

11 Abhii jhe hilu jhumo jhuna malango, abhii jhe hilu jhumo jwampalaha Chapanga.

12 Bhoha bhannekite Chapanga,

bhoha bhalemwiye,

abhii jhe jwahenga lyaumbone, abhii jhe ata jhumo.

13 Maholilo ghabhe ghabhii ngita mambe yapala, Ndime yabhe ilonge uwange.

Mu milomo jhabhe ghapita malobhe ghina uchongo ngita gwa lijhoka.

14 Malobhe ghabhe ghibhalonge ghatwelii likoto twe na uchongo.

15 Magholo ghabhe ujhojhokela kukoma,

16 popoha pibhajhenda uhangabhana na kuleka mang'ahe,

17 bhahotojhe kutama kwa uteeke.

18 Muntembeke jhe Chapanga.”

19 Ngohe tumanye kubhehe Lilaghalikilo lya Mucha puilonge, ilonge na bhando bhala bhibhapalwa kulongochwa na Lilaghalikilo ndi kila mundo akotoka kukikengelela, na kulangii bhando bhoha bha pannema bhipalwa kuhadabulwa na Chapanga.

20 Yene abhii jhe mundo jhojhoha jwabhalangilwa jwaumbone palonge jha Chapanga kwa kuhenga chilipala Lilaghalikilo, Lilaghalikilo linangii mundo amanye atehi uhakaho.

Kubhehe bhaumbone kwa Chapanga kwa ndela jha kihobholelo

²¹ Nambo ngoheno Chapanga atehi ndela jhake jha kwatenda bhando imanyikane. Ndela jhenje ihobhole jhe Lilaghalikilo. Kumalangila mundo abhehe jwaumbone palonge jhake, chi kwa kuhobholela lilaghalikilo. Malaghalikilo gha Mucha na milondole bha Chapanga bhilonge mambu ghanga.

²² Chapanga ubhabhalangi bhando bhaumbone palonge jhake kwa kunnyekete Yecho Kilichitu. Chapanga uhenga yenio kwa bhoha bhuhajheketile Kilichitu, akwetii jhe mapejha kwa Akayahude na bhando bhange,

²³ nhwalo bhando bhoha bhatehi uhakaho na kupongokewa na ung'alicho gwa Chapanga.

²⁴ Nambo kwa nhwalo gwa umbone gwa jhajhe gwa Chapanga, bhando bhoha bhabhalangilwe bhaumbone jhajhe palonge jhake kwa ndela jha Yecho Kilichitu ndi jwatukombola.

²⁵ Chapanga akampihite Yecho kubhehe litambiko lya ujhelanicho lya kwabhoke bhando uhakaho gwabhe kwa kuhobholela miyahe jhake. Kwa miyahe jhake ibhehe ndela jha kwabhokeya bhando uhakaho gwabhe kwa kihobholelo chabhe kibhehe kwa jwenio. Chapanga atehila naha kulangiya jwenio ndi jwaumbone. Kuhumii makacho Chapanga akibha na luhimba, akabhahadabwii jhe bhando kwa uhakaho gwabhe.

²⁶ Nambo ngoheno atehi naha Chapanga kulangii ndela jha umbone chiubhile palonge jhake. Nhwalo Chapanga jwenio ukilangiya kubhehe ndi

jwaumbone na kwa mundo jhojhoha umalangila
jwaumbone kwa ndela jha kunyeketela Yecho.

²⁷ Bho, ngoheno tuhoto kulokela nike? Kibhii
jhe! Bho, kwa nhwalo ghane? Bho, mundo ihotola
kukiloka kwa kukamula Lilaghalikilo lya Mucha?
Nahi jhe, kwa nhwalo tuhobholela Yecho.

²⁸ Nhwalo ngohe tumanya mundo ulangii
jwaumbone kwa Chapanga kwa kihobholelo,
na chi kwa nhwalo gwa kukamula Lilaghalikilo
lya Mucha.

²⁹ Bho, Chapanga ndi Chapanga jwa Akayahude
kanjika chabhe? Bho, helahela chi Chapanga jwa
bhando bha ilambo henge? Chakaka, helahela
jwenio ndi Chapanga jwa ilambo yoha,

³⁰ nhwalo abhii Chapanga jhumo tugha,
nga jwenio nabhabhalangila Akayahude
bhuhajhingii jando bhaumbone palonge jhake
kwa kihobholelo chabhe, na bhando bha ilambo
henge kwa kihobholelo chabhe helahela.

³¹ Bho, ngohe tubheke kihobholelo kutale kwa
kujheketela kongo kulighalambuwa Lilaghalik-
ilo kwa nhwalo gweniogho? Nahi jhe, nambo
tulipela utopelo Lilaghalikilo.

4

Nnandanikiho gwa Ulahimo

¹ Bho, tulonge nike kupete tate gwito Ulahimo?
Bho, akalolite kilebhe ghane?

² Bhahe, anda Ulahimo abhonikina jwaumbone
palonge jha Chapanga kwa mahengo ghake, bho,
nambo ngahotwii jhe kukilokela nambo chi pa-
longe jha Chapanga.

³ Nhwalo Majhandiko gha Chapanga ghilonge, “Ulahimo akannyeketile Chapanga na kuhumii peniya abhonikina jwaumbone palonge jha Chapanga.”

⁴ Mundo jwahenga lihengo, chi abhalangilwa ngita hupo, nambo ndi lihuke lyake.

⁵ Nambo mundo jwangahobholela mahengo ghake jwenio, nambo anhobholela Chapanga jwabhalangila bhanganandela bhoha bhakoto kubhehe na uhakaho, bhahe, kihobholelo cha mundo jwenio, ubhonekana chambone.

⁶ Daude akalongii kilebhe chenje, jwakalongile mbaha mundo jhola jwabhalangilwa kubhehe jwaumbone palonge jha Chapanga changalolekeya matendelo.

⁷ “Bhina mota bhala bhimbhalekekiwe malemo ghabhe, na uhakaho gwabhe ulekekiwe.

⁸ Jhuna mota mundo jhola, Bhambo amalangila jhe uhakaho gwake.”

⁹ Bho, mota yenio kwa bhando bhubhajhingii jando kanjika chabhe? Nambo kwa bhando bhala bhangajhingii jando helahela. Nhwalo bhoha tukalongalile kulonge, “Ulahimo akannyeketile Chapanga, na kwa kunnyeketela kwake akabhalangilwe kubhehe jwaumbone palonge jha Chapanga.”

¹⁰ Bho, Ulahimo abhalangilwa ligha kubhehe jwaumbone palonge jha Chapanga? Bho, akibha ajhingii jhe jando amu pakibha amela na lilopoto lyake? Akabhalangilwe kubhehe jwaumbone palonge jha Chapanga akibha amela anajhingii jhe jando.

¹¹ Ulahimo akajhingii jando palonge, na kilebhe chenie kijhakubhehe unepo kwa Chapanga chakumalangila Ulahimo jwaumbone pajhingila jando kwa ndela jha kihobholelo chake. Yene Ulahimo ndi tate jwa bhando bhoha bhuhajheketile Chapanga, pamonga na gwangajhingii jando jhake. Na bhene hele bhabhalangilwa bhaumbone palonge jhake.

¹² Helahela Ulahimo ndi tate jwa bhando bhoha bhuhajhingii jando, nambo chi kwa kujhingii jando tugha, nambo nhwalo bhakengama ndela jhela jha kihobholelo cha tate gwito Ulahimo jwakengima pakibha amela jwangajhingii jando.

Lilaghano lya Chapanga upokelwa kwa kihobholelo

¹³ Chapanga akalapanikiye Ulahimo na ibheluko yake yoha nnema ghongo ghoha naubhaha gwabhe. Nabhapokela nnema ghoha chi nhwalo Ulahimo akalikamwii Lilaghano, nambo nhwalo akannyeketile Chapanga, na Chapanga akamalangile jwaumbone palonge jhake.

¹⁴ Nhwalo chalaghile kupoke Lilaghano lyalaghile Chapanga ndi bhala tugha bhuhhakamula Lilaghalikilo, bhahe, ngohe kihobholelo kibhonekana kilebhe nacho, na lilaghano lya Chapanga helahela kilebhe nacho.

¹⁵ Bhahe, Lilaghalikilo lijhimuu lilaka lya Chapanga, nambo nakubhehe jhe Lilaghalikilo, ngaubhii jhe ulemo.

¹⁶ Yene lilaghano lihobholela kihobholelo, ili lilaghano lyenio libhonekane lyaumbone

gwa Chapanga, na panane jha gheniya uchakaka lilaghano lyenio ndi lya bhando bhoha bha kibheluko cha Ulahimo, chi kwa bhala bhibhakamwii lilaghalikilo tugha, nambo helahela kwa bhala bhibhabhii na kihobholelo ngita cha Ulahimo, jwakibha tate gwito bhoha.

¹⁷ Ngita chighalonge Majhandiko gha Chapanga, “Nihagwii kubhehe tate jwa bhando bhoha.” Lilaghano lyenio ndi chakaka palonge jha Chapanga, jwenio Ulahimo akahobholile Chapanga jwenio ndi tate gwito. Chapanga jwapiya ughome kwa bhando bhibhawile na kuihobholela ilebhe yangabhegha ipitile.

¹⁸ Yene na kubhehe jhe kilebhe cha kunhenga Ulahimo ahobholele lilaghano, Ulahimo akanyeKETILE Chapanga na kuhobholela lilaghano, na kubhehe tate jwa bhando bhoha, ngita chighalonge Majhandiko gha Chapanga, “Kibheluko chino nakibhaha mbwe ngita ndondwa.”

¹⁹ Ulahimo akibha aghoime yaka yake ibhandikila makome kome, nambo kihobholelo chake kikatundungile jhe nambo Sala nhwana mundo akamanye yaka yake ya kupapa mwana ikapetite na helahela akibha ntonga.

²⁰ Ulahimo akibha jhe na kiholo na lilaghano lya Chapanga, ajhakubhehe na likakala kwa kuhobholela kwake, yenio ajhakunomba Chapanga.

²¹ Atehila naha nhwalo akamanye uchakaka Chapanga jwabhohite lilaghano lela abhii na ukindendeke gwa kulenganikiya ghalaghila.

²² Yene kwa kujheketela kwake, “Chapanga aka-malangile kubhehe jwaumbone palonge jhake.”

²³ Puilongelwa, “Akajheketilwe palonge jha

Chapanga kubhehe jwaumbone,” ikajhandikwii jhe kwa nhwalo gwa Ulahimo tugha,

²⁴ nambo twenga helahela tubhalangilwa kubhehe twaumbone kwa Chapanga jhutihobholela, jwakayokiche Yecho Bhambo gwito, kuhumii kubhawile.

²⁵ Jwenio akapihitwe akomwe kwa nhwalo gwa uhakaho gwito na peniya akayokite tubhalangilwe twaumbone palonge jha Chapanga.

5

Kilichitu atujhelanicha na Chapanga

¹ Nhwalo kwa kujheketela tubhalangilwe twaumbone na Chapanga kwa ndela jha kihobholelo, tubhii na uteeke pakate jhito na Chapanga kwa ndela jha Bhambo gwito Yecho Kilichitu.

² Kwa kihobholelo chito, Yecho atulongwiye kwa umbone gwa Chapanga, ngohe umbone gwa Chapanga ndi tutama nkate jhake. Bhahe, tuhanganila lihobholelo litukwete leno lya kubhehe pamonga na ung'alicho gwa Chapanga!

³ Chakaka, gheniya tuujhe, tuhanganila helahela mu malagho ghito, nhwalo tumanya malagho ghileta luhimba,

⁴ na luhimba luleta ukangamalo gwa mwojho na ukangamalo gwa mwojho uleta lihobholelo.

⁵ Lihobholelo lende lituhengelecha jhe mwojho, nhwalo Chapanga atujhitii upalo gwake mu mwojho kupete Uhuke gwa Chapanga jwatupeki twenga.

⁶ Kwa nhwalo putukibha twamela leghele, Kili-chitu akawile kwa nhwalo gwito twenga twanganandela kwa machiko ghaghahagwile.

⁷ Ilimbite kwa mundo kujheketela kuwegha kwa nhwalo gwa mundo jwaumbone, pange mundo ihoto kukipiya nchebho kwa mundo jwab-hii jwaumbone.

⁸ Nambo Chapanga atulangii hotuhotu atupahile. Nhwalo tukibha twamela na uhakaho, Kilichitu pawila kwa nhwalo gwito.

⁹ Ngoheno tubhalangilwe twaumbone palonge jha Chapanga kwa miyahe jha Yecho, ilangii natughombolelwa chakaka na jwenio mulilaka lya Chapanga.

¹⁰ Nhwalo putukibha twakamakoko bha Chapanga, tujhelanichwe kwa ndela jha kuwe kwa Mwana mundo. Na ngoheno natujhelana nde na jwenio, chakaka natuchocha bhole natughombokoka kwa kupete ughome kwa Kilichitu.

¹¹ Nambo gheniya tuujhe, nambo bhoha tuhanganila kwa nhwalo gwa Chapanga kwa kupete ndela jha Bhambo gwito Yecho Kilichitu jwatujhelanicha kabhele na Chapanga.

Adamo na Kilichitu

¹² Uhakaho ukajhingii pannema kwa mundo jhumo, na uhakaho gwenie ujhakutumbukiya kuwegha. Na ngoheno kuwegha kwahibhilikiya bhando bhoha, kwa nhwalo bhoha bhatehi uhakaho.

¹³ Uhakaho ukibha pannema changabhehe jhe Lilaghalikilo lya Mucha, nambo uhakaho ubhalangilwa jhe uhakaho pala panga Lilaghalikilo.

¹⁴ Nambo kuwe kikalongwiche machiko gha Adamo ade machiko gha Mucha, na ata bhala bhangahenga uhakaho ngita hela gwa Adamo, gwa kunpucha Chapanga.

Adamo jwenio abhii ndi nnandanikiho gwa jhola Chapanga jwapangite ahike.

¹⁵ Nambo ulemo gwa Adamo lihoto jhe kulenganichwa na hupo jha jhajhe jha Chapanga. Nhwalo kulemwa kwa mundo jhumo kuletite kuwegha kwa bhando bhamahela, kulangii kubhehe kwa Chapanga ajhonjikiye umbone na hupo jhake jhiihenile kwa bhando bhamahela, jhihumile kwa ndela jha mundo jhumo, ndi Yecho Kilichitu Nkomboche.

¹⁶ Hupo jha jhajhe jha Chapanga ilenganii jhe na ilebhe ipitile kwa nhwalo gwa uhakaho gwa mundo jhumo, nhwalo ulemo gwa mundo jhumo, Chapanga aletite luhadabulo kwa bhoha. Nambo kwa malemo gha bhando bhamahela, Chapanga apihite umbone gwake kwa kwalekekeya uhakaho.

¹⁷ Chakaka uhakaho gwa mundo jhumo, kuwegha kulongocha kwa nhwalo gwa jwenio mundo. Nambo chikipitile kwa mundo jhola jhumo, yane ndi Yecho kilichitu ndi kilebhe kikolongwa hake! Bhoha tupokela umbone twe gwa Chapanga gwa jhajhe bhatendwa bhaumbone palonge jhake nabhalongocha muughome kwa ndela jha Kilichitu.

¹⁸ Bhahe, anda ulemo gwa mundo jhumo gwaletii luhadabulo bhando bhoha, helahela kitendwa chimo cha mbone kighombola bhando bhoha na chaleta ughome.

¹⁹ Nhwalo gwa kupucha kwa mundo jhumo, bhando bhamahela bhabhii muuhakaho, helahela kwa kujhokanikiya kwa mundo jhumo kwa Chapanga, bhando bhamahela bhatehilwe bhaumbone palonge jha Chapanga.

²⁰ Lilaghalikilo lihikite kupala kujhonjekeya gwanganadela, nambo pala uhakaho pujhonjikika, helahela umbone gwa Chapanga puuchochita kujhonjekeka hake.

²¹ Ngita uhakaho puilongwicha na kutulete kuwegha, helahela umbone gwa jhajhe gwa Chapanga ulongoche kwa ndela jha kutendwa twaumbone palonge jha Chapanga na uleta ughome gwa machiko ghoha ghangapeta kwa ndela jha Yecho Kilichitu, Bhambo gwito.

6

Ughome nhyono mukulombana na Kilichitu

¹ Ngoheno tulonge nike? Bho, tujhenderele kuhighalika muhakaho ndi umbone gwa Chapanga ujhonjekeke?

² Nahi jhe! Twenga tuwile kwa nhwalo gwa uhakaho, ngohe natujhenderele bhole kuhenga kabhele uhakaho?

³ Chakaka umanye kubhehe twenga twabhoha bhitubatiche tulombine nde na Yecho Kilichitu, twenga tukalombine mukuwe kwake kwa kubaticha.

⁴ Putubaticha tukachikite pamonga na jwenio, na tukalombine nde mukuwe kwake, ndi hele tuchikwitwe pamonga na jwenio ngita Kilichitu payokichwa kuhumii kumambe. Kwa ung'alicho

gwa lihengo lya Tate, helahela na twenga tutama mughome nhyono.

⁵ Nhwalo twenga tulombine mukuwegha ngita jwenio, helahela natulombona na jwenio mu kuyokechwa kuhumii kubhawile.

⁶ Bhahe, tumanye kubhehe ughome gwito gwa uhakaho gwa makacho ukabhambitwe panchalaba pamonga na Kilichitu, ndi likakala lya uhakaho lilibhii payegha jhito ihangabhanwe. Tukoto kubhehe akabhanda bha uhakaho.

⁷ Nhwalo mundo jwawile abhalangilwe jwaumbone palonge jha Chapanga, na alongochwa jhe na uhakaho.

⁸ Ngohe, anda tuwile pamonga na Kilichitu, tuhobholela kubhehe natutama pamonga na jwenio.

⁹ Nhwalo tumanye kubhehe Kilichitu ayokichwe kuhumii kubhawile na jwenio ahwee ng'o kabhele, nhwalo kuwegha nakunongowa jhe.

¹⁰ Bhahe, nhwalo akawii mala jhimo nhwalo gwa uhakaho gwa bhando, likakala lya uhakaho libhii jhe kabhele panane jhake na ngoheno atama pamonga na Chapanga mu ughome gwake.

¹¹ Helahela mangota mukibhalangile kubhehe nhwile kupete uhakaho, mitama pamonga na Chapanga kwa ndela jha Yecho Kilichitu.

¹² Peniya uhakaho, ukoto kujhenela muyegha jhino jhiwegha, ndi nkoto kuijhokanikiya tama jha yegha.

¹³ Nkotoka kubhoha hilu ihungo ya yegha jhino kwa kuhenga ghangandela na uhakaho. Nambo mukitende nchebho mabhene kwa

Chapanga, ngita bhando bhuyokichwe kuumii mukuwegha, na mupiye ihungo hino kwa Chapanga kwa kuhenga ghala ghambone ngita chaipala Chapanga.

¹⁴ Uhakaho naghupambalaka jhe kabhele, nhwalo mangota mitama jhe pahe jha lilaghalikilo, nambo mmii pahe jha umbone gwa jhajhe gwa Chapanga.

Ntumiche jwa kuhenga ghaumbone

¹⁵ Ngohe, tulonge nike? Bho, tujhenderelela kuhenga uhakaho nhwalo tubhii jhe pahe jha Lilaghalikilo tubhii pahe jhaumbone gwa jhajhe? Nahi jhe!

¹⁶ Chakaka mumanye anda mukipiya mabhene kwa nnyino mundo ngita mabhanda na kunteba teno, mangota mubhehe makabhanda bha mundo jwenio. Amu mubhehe makabhanda bha uhakaho na chikipitila ndi kuwegha, amu kujhekete na chikipitila kutendwa kubhehe mambone kwa Chapanga.

¹⁷ Pamonga mukibha makabhanda bha uhakaho makacho, nichenguu Chapanga ngoheno nnyeketile kwa mwojho gwino ghoha kwa ghala mabholo ghupokile.

¹⁸ Mangota bhankombwile kuumii muubhanda gwa uhakaho, na mmi makabhanda ghaghala Chapanga uhenge.

¹⁹ Pamba nilonge jhe malobhe ghakujhundupa nhwalo mangota naumanya ng'o chinilongela. Ngita makacho mukajheketele kubhehe makabhanda bha luku na ubhoho, helahela ngohe

nnyeketile kubhehe ghala ghaghapahi Chapanga ndi mme nyahinyahi.

²⁰ Nhwalo pumukibha makabhanda bha uhakaho, mukibha mulongochwa jhe na ghala ghaghapala Chapanga.

²¹ Bho, ngoheno mu kajhambulile kilebhe ghane machiko ghala na ngohe mabhene mighakole hone? Nhwalo ghala ghunteila ghileta kuwegha!

²² Nambo ngoheno nkombolilwe njwe kuhu-mii mubhanda gwa uhakaho na kubhehe makabhanda bha Chapanga, chinyambulile ngoheno ndi unyahinyahi, na gwenio uleta ughome gwa machiko ghoha ghangapeta.

²³ Nhwalo malepo gha uhakaho ndi kuwegha, nambo hupo jha Chapanga ndi ughome gwa machiko ghoha ghangapeta kwa kulombana na Kilichitu Yecho, Bhambo gwito.

7

Lilaghalikilo lya kutolana

¹ Makalongo bhango, chakaka umanyite ghini-longe, nhwalo nimanya nilonge na bhando bhubhamanyite lilaghalikilo. Lilaghalikilo unongocha mundo jwabhii ghome tughu.

² Tulonge, mwikeghe jwatolilwe abhehe pahe jha lilaghalikilo kwa machiko ghoha unganamundo pabhehe ghome, nambo unganamundo anda ajhomwike, lilaghalikilo lyenio linongocha jhe kabhele mwikeghe jwenio.

³ Ngohe anda mwikeghe jwenio atolilwe na mundo jhonge kongo unganamundo amela

ghome, peniya nakemwa nngongola. Nambo anda unganamundo awile, mwikeye atabhwa jhe na lilaghalikilo, na peniya ihenga jhe ngongola ata atolelwe na munalome jhonge.

⁴ Helahela na mangota makalongo bhango, mmi jhe pahe jha lilaghalikilo nhwalo nnombine na yegha jha Kilichitu, na mmi bhando bha mundo jhonge, jhola tunhengele ghambone Chapanga.

⁵ Nhwalo pututamita na kone tulongochwa na yegha, mapalo gha yegha ghakwelekiya na lilaghalikilo, lihengita lihengo mu yegha jhito na ghoha ghutuhengita ghajhomwikila mu kuwegha.

⁶ Nambo ngohe tubhii jhe pahe jha lilaghalikilo, kwa nhwalo anda tukawile kwa kilebhe chela chikituteila takabhanda. Na ngoheno tuhoto kunhenge Chapanga kwa ughome nhyono ghughabhii pahe jha ulongoche gwa Uhuke gwa Chapanga, na chi kwa ndela jha makacho jha lilaghalikilo lilijhandikwe.

Lilaghalikilo na uhakaho

⁷ Bho, ngohe nongele kilebhe ghane? Bho, lilaghalikilo ndi uhakaho? Nahi jhe! Nambo changa lilaghalikilo, nenga ngamanyite jhe uhakaho ndi kilebhe ghane. Lilaghalikilo nakulonge jhe, “Nkotoka kunoghelwa na kilebhe channyino.” Ngamanyite jhe kunoghelwa ndi kilebhe ghane.

⁸ Kwa nhwilo gwenio, uhakaho ujhakupata ndela jha kujhimuha namuna jha tama mbajha jhoha jhibhii nkate jhango. Nhwalo nalilaghalikilo jhe uhakaho ukawile.

⁹ Makacho nikibha ghome changamanya lilaghalikilo, nambo nhwilo puuhikita, ndi uhakaho ujhakujhenela mu ughome gwango na nenga nyakubhehe ngita awile.

¹⁰ Nolita nhwilo gwenio ghupalita kuleta ughome, nambo kwa nenga inetii kuwegha.

¹¹ Nhwalo uhakaho ujhakutukunyula mwenio muhwilo, ijhakungopokeya na kungoma kwa ndela jhene.

¹² Bhahe, lilaghalikilo ndi lya nyahinyahi, na nhwilo ndi gwa nyahinyahi na inhalalicha Chapanga na gwa mbone.

¹³ Bho, ngohe chela chinongile kinetii kuwegha? Nahi jhe! Itendike yenio imanyikane kubhehe uhakaho ndi uhakaho, itumike mu kilebhe chela chambone na kunete kuwegha kwango. Yene uhakaho kupete nhwilo ilangiya chinikibha na mundo nahakaho hake.

Ngondo nkate jha mundo

¹⁴ Tumanye kubhehe lilaghalikilo lihuma nkate jha Uhuke gwa Chapanga, nambo nenga jwa Uhuke gwa Chapanga jhe, nenga njulwichwe mme nabhanda bha uhakaho.

¹⁵ Manyite jhe chinihenga, nhwalo chela chinikipala nihenga jhe, nambo chela chinikichimwa ndi chinikihenga.

¹⁶ Nambo nihenga kimbendangule, chakaka ni-jheketela Lilaghalikilo ndi lyambone.

¹⁷ Nambo namwete jhe jhunihenga ghanga, nambo ghola uhakaho ghutama nkate jhango.

¹⁸ Nimanya kubhehe libhii jhe lyolyoha lyambone nkate jhango, mu yegha jhango jha uhakaho.

Nhwalo punipala kuhenga kilebhe chambone, nihoto jhe.

¹⁹ Nhwalo nihenga jhe ghambone ghinipala kuhenga, nambo nihenga ghangandela ghangapala kuhenga.

²⁰ Nambo anda nihenga kimbendangule, chinenga jhunienga gheniya, nambo uhakaho ghubhii nkate jhango ndi ghuhenga.

²¹ Ngoheno umbwile kilebhe chenje, punipala kuhenga kilebhe chamaha, ghangandela ghabhii papa.

²² Nambo nkate jha mwojho gwango nihanganii lilaghalikilo lya Chapanga.

²³ Nambo nilola kubhehe libhii lilaghalikilo lenge lilihenga lihengo payegha jhango. Lilaghalikilo lyenio litenda mme nabhanda bha uhakaho ndi jhilihenga lihengo payegha jhango.

²⁴ Kulagha nenga! Bho, ghane nang'ombola kubhoke muyegha jhenje jhinete kuwegha?

²⁵ Uchengulo kwa Chapanga jwangombola kupete Bhambo Yecho Kilichitu!

Ngohe yenio ndi chimile namwete, mu malango ghango, nabhanda jwa lilaghalikilo lya Chapanga, nambo kwa yegha jhango nabhanda bha lilaghalikilo lya uhakaho.

8

Kutama kwa makakala gha Uhuke gwa Chapanga

¹ Yene lubhii jhe luhadabulo kwa bhala bhibhalombine na Yecho Kilichitu.

² Nhwalo lilaghalikilo lya Uhuke gwa Chapanga lilimbekeya ughome kwa kulombana na Yecho

Kilichitu, lingombwile kuhumii mu lilaghalikilo
lya uhakaho na kuwegha.

³ Chapanga atehi kilebhe chela changahoto
kuhengwa na Lilaghalikilo lya Mucha nhwalo
yegha jha uhakaho ndi leghele. Chapanga
ajhakuntuma Mwana mundo jwalandine ngita
yegha jhito twenga bhutubhii na uhakaho, na
kwa nhwalo gwa uhakaho ahuhadabule uhakaho
kwa yegha jhene.

⁴ Chapanga atehila yenio luhadabulo lulupalwa
na Lilaghalikilo lutime nkate jhito twenga bhutu-
tama kwa makakala gha Uhuke gwa Chapanga, na
chi kwa makakala gha yegha jha uhakaho.

⁵ Nhwalo bhala bhibhatama kwa kukengama
ghighapala yegha, malango ghabhe ulongochwa
na ghighapala yegha. Nambo bhala bhibhatama
kwa kunkengama Uhuke gwa Chapanga, malango
ghabhe unkengama ghapala Uhuke.

⁶ Kwa nhwalo malango ghighalongocha yegha
jhibhii na uhakaho uleta kuwegha nambo
malango ghighalongochwa na Uhuke gwa
Chapanga uleta ughome na uteeke.

⁷ Nhwalo mundo jwalongochwa kwa
kukengama yegha ndi jwenio ubhehe likoko
lya Chapanga, hilu haijheketela jhe lilaghalikilo
lya Chapanga na ahoto jhe kulijheketela.

⁸ Bhando bhala bhibhalongochwa na yegha
jhibhii na uhakaho, bhahoto jhe kunhalalicha
Chapanga.

⁹ Nambo mangota anda Uhuke gwa Chapanga
abhii nkate jhino mulongochwa jhe na yegha,
nambo mulongochwa na Uhuke, anda mundo

jhojhoha jwangabhehe na Uhuke jwa Kilichitu, jwenio jwa Kilichitu ndeka.

¹⁰ Nambo anda Kilichitu abhii nkate jhino, pamonga na yegha jhino kuwegha kwa nhwalo gwa uhakaho. Uhuke gwino ubhii ghome na kubhalangilwa bhaumbone palonge jha Chapanga.

¹¹ Na anda Uhuke jwa Chapanga jhola jwakayokiche Yecho Kilichitu kuhumii kubhawile abhii nkate jhino, jwenio jwakayokicha Yecho helahela naipela ughome yegha jhino jhiwegha. Nahenga yenio kwa Uhuke gwake, jwabhii nkate jhino.

¹² Bhahe, makalongo bhango tubhii na lighambo, tupalwa jhe kutama ngita yegha jhito jha uhakaho chitupala tutame.

¹³ Nhwalo anda natama ngita yegha chiipala, chakaka miwegha. Nambo anda tuikomite hela yanganandela itehilwa na yegha kwa ndela jha Uhuke, nanama.

¹⁴ Bhando bhoha bhubhalongochwa na Uhuke gwa Chapanga, bheniya ndi yana ya Chapanga.

¹⁵ Kwa nhwalo mupokii jhe Uhuke jwantenda ntame mubhanda kabhele na kunnete bhoghohe, nambo mpatite Uhuke jwantenda mme yana ya Chapanga. Na kwa uhotolo gwa Uhuke gwenio, twenga tunkema Chapanga, “Aba!” Yane Tate.

¹⁶ Na Uhuke gwa Chapanga jwenio alonge pamonga miojho jwito kubhehe twenga ndi yana ya Chapanga.

¹⁷ Ngohe twenga ndi yana mundo, tupokii mota yoha ya Chapanga yabhabhekii bhando bhake, helahela natubhujhila mabhujhilo pamonga na Kilichitu chela chabhekilwe, nhwalo anda tung'ahika pamonga na jwenio, helahela

natutama mung'alicho gwake.

Ung'alicho ghuhika

¹⁸ Kwa nhwalo nimanya mang'ahe gha machiko ghanga kilebhe nacho ghalandana jhe na ung'alicho ghola ghuyekulilwa palonge jhito.

¹⁹ Ihumbi yoha ipanginwe ilendelela kwa kilolo hake kwa kwayekulila kwa yana ya Chapanga hotuhotu.

²⁰ Nhwalo ihumbi yoha iteilwe kilebhe nacho, chi kwa kupala yenio, nambo kwa kutendwa yenwe kwa kupala Chapanga, pamonga na yenio libhii lihobholelo,

²¹ ihumbi yenio naighombolelwa kuhumii mubhanda gwa kuhangabhika, na kujhingii mu ung'alicho gwa kukombolelwa gwa yana ya Chapanga.

²² Kwa nhwalo twenga tumanye ade ngohe, ihumbi yoha ipanginwe ibhobhola kwa lipyanda ngita lipyanda lya kupapa mwana.

²³ Chi ihumbi tu, ata twenga bhitukwete Uhuke gwa Chapanga, jwabhii jwakutumbula jwa hupo jha Chapanga, helahela tubhobhola cha nkate kone tulendelela tutendwe yana ya Chapanga na kukombolelwa yegha jhito.

²⁴ Kwa nhwalo tukakombolilwe mu lihobholelo lyenio, nambo anda kilebhe chikihobholelwa kibhonekana peniya libhii jhe lihobholelo kabhele. Bho, mundo ghane jwahobholela kilebhe chakwete njwe?

²⁵ Nambo anda tukihobholelo chela chamela kukibhona, bhahe, tukilendelela kwa kuhimbalila.

26 Helahela atutangatila Uhuke muleghele gwito. Nhwalo tumanyite jhe kunnyopa Chapanga chiipalwa, nambo Uhuke jwenio atujhope kwa Chapanga kwa kubhobhola kwangahoto kuchimulila.

27 Chapanga jwalingukiya nkate jha miojho jhito, amanye Uhuke gwa Chapanga chakihola, kwa nhwalo Uhuke gwa Chapanga ubhajhope bhando bha Chapanga ngita chapala Chapanga.

28 Chakaka tumanye muilebhe yoha, Chapanga ihenga kwa mambu ghoha kubhehe ghambone kwa bhala bhubhampahile, ndi bhala bhabhakemite ngita chapalita jwenio.

29 Nhwalo bheniya akabhahagwii kuumii makacho, bhalandane na Mwana mundo, kupala mwana abhehe jwalongolile kubhelukwa pakate jha akalongo twe.

30 Bhala bhabhahagwii Chapanga ndi bhabhakemite, na bhala bhabhakemite ndi ajhakwabhalangila bhaumbone palonge jhake, na bhala bhaumbone ndi abhapekii ung'alicho gwake.

Upalo gwa Chapanga kwa kulombana na Kili-chitu

31 Ngohe tulonge nike kwa ghanga ghoha? Anda Chapanga abhii lubhoko lwito, bho, ghane nahotola kutukanii?

32 Chapanga akankolii jhe kiya ata Mwana mundo jwa kanjika, nambo akamohite kwa nhwalo jwa twenga twabhoha. Anda akamohite Mwana mundo, bho, natupela jhe ilebhe yoha jhajhe pamonga na jwenio?

³³ Ngohe ghane nahotola kwatakalila bhando bhuhahagwilwe na Chapanga? Chapanga jwenio ndi jwalonge bhakwete jhe malemo!

³⁴ Ngohe ghane jwapala kuhadabula? Abhii jhe, nhwalo Yecho Kilichitu ndi jwawile, kabhele akayokite kuhumii kubhawile na kutama lubhoko lwalelo lwa Chapanga. Jwenio ndi jwatu-jhopela twenga!

³⁵ Ngohe ghane natulombotola kubhoke mupalo gwa Kilichitu? Bho, malola, amu mang'ahe amu malagho amu njala amu gwangabhehe na ngobho amu mu kuhandanda jha kuwegha amu kuwegha?

³⁶ Ngita chighalonge Majhandiko gha Chapanga,

“Kwa nhwalo gwino tubhii mu kuhandanda jha kuwegha kilo na muhe,

tulandana ngita mambelele ghigahjenda kuchinjwa.”

³⁷ Nahi jhe, mu ghoha ghangha twenga tulepelile jhe kupete jwenio jwatupahile.

³⁸ Nhwalo nimanye kibhii jhe kilebhe chikihotola kunombotola na upalo gwake. Chi kuwegha, chi ughome, chi akatumiche bha kunane kwa Chapanga, chi makakala ghange gha michuka, chi ilebhe ya ngohe amu ghighapala kupitila palongolo, chi bhuhhalongocha,

³⁹ chi makakala gha kunane, chi makakala gha pahe, hilu chochoha chikipanginwe, kihoto jhe kutumbotola twenga na upalo gwa Chapanga ghubhii mu kulombana na Yecho Kilichitu Bhambo gwito.

9

Chapanga na bhando bhake

¹ Nilonge uchakaka, nombine na Kilichitu, nilonge jhe uwange. Mwojho gwango ujheketelana na Uhuke gwa Chapanga kubhehe ne nilonge jhe uwange.

² Nenga nipala kulonge naha, ngwete ungolongonde twe na lipyanda lyangajhomokela kumwojho gwango.

³ Kwa nhwalo ngahotwi kujhopa mme na likoto na mme kutale na Kilichitu kwa nhwalo jha makalongo bhango Akayahude, bhando bha likabila lyango.

⁴ Bheniya ndi bhando bha Ichilachele, Chapanga abhahagwile bhabhe bhake, jwabhalangii ung'alicho gwake, ajhakuenga malaghano nabho, na kwapekeya lilaghalikilo lyakwe. Ndela jha kunnyinamila jwenie na lilaghamo lyakwe.

⁵ Ndi ichokolo ya akahokolo bha Akaebulaniya, na Kilichitu akabhelwike kiyegha ku humii mu likabila lyabhe. Chapanga ndi jwalongocha mambu ghoha, na alombwe machiko ghoha ghangapeta! Amina.

⁶ Nilonge jhe kubhehe lilaghamo lya Chapanga lilepalile, nhwalo chi bhando bhoha bhu ku Ichilachele ndi bhahaghulilwe na Chapanga.

⁷ Na chi ichokolo yoha ya Ulahimo ndi yana ya Chapanga. Nambo Chapanga akanaghile Ulahimo, "Kupete kwa Isaka ndi nampata kibheluko chininnaghile."

⁸ Nhwalo bhala bhubhabhelwike kiyegha, yenio yana ya Chapanga jhe bhala bhubhabhelwike

kwa lilaghano lya Chapanga bheniya ndi bhibhalangilwa yana ya Ulahimo.

⁹ Chapanga akabhekite lilaghano lyake naha, “Kipinde ngita chenje nahika kabhele na Sala napapa mwana munalome.”

¹⁰ Gheniya tuu jhe, hele Lebeka akibha na mabhela ghinalome jwabhapapite kwa tate jhumo, jwenio ndi hoko gwito Isaka.

¹¹ Nhwalo yana yenio ya mabhela nakubhelukwa jhe hilu bhanatumbuu jhe kuhenga lyolyoha lyambone amu lyanganandela, chapala Chapanga kibhehe nganganga,

¹² Chapanga akannongolile Rebeka, “Mwana nkolongwa natumikila unung'una mundo.”

¹³ Majhandiko gha Chapanga ghilonge, “Nikampahii Yakobu nambo nikachimwite Echau.”

¹⁴ Bho, ngohe tulonge nike? Bho, Chapanga ilolokeya kumiho? Nahi jhe.

¹⁵ Nhwalo Chapanga akanobholile Mucha, “Nanintangatila mundo jhojhoha jhunipala kuntangatila, naninkolela kiya mundo jhojhoha jhunipala kumone kiya.”

¹⁶ Gheniya ghoha ghiehobholela kiya jha Chapanga, na chi chapala mundo amu chahenga mundo.

¹⁷ Kwa nhwalo Majhandiko gha Chapanga ghilonge naha kwa Falao munahota jwa ku Michile, “Nikantei mme manahota makolongwa, uhotolo gwa kulangii makakala ghango ghamanyikane kupete mwenga na liina lyango limanyikane nnema ghoha.”

¹⁸ Ndi kulonge Chapanga unkolela kiya mundo jhola jwapala kumone kiya, na apahii kuntenda

mundo abhehe na lighoho, utenda abhehe na lighoho.

Lilaka na kiya jha Chapanga

¹⁹ Pange jhumo pakate jhino nangonya, “Anda mambu ghabhii naha, nhwalo gwa nike Chapanga atuhadabula? Bho, ghane nahotola kughahibhili-kiya ghala ghapala Chapanga?”

²⁰ Ngohe mwe ma mundo ghane jhumunyan-guu Chapanga naha? Kihulo kihoto jhe kunkonya jwabhomba, “Nhwalo gwa nike umombite naha?”

²¹ Jwabhomba ihoto kubhombela ihulo ibhele kwa undope ghumo ngita chapala, chimo kwa lihengo lya maha na chenge kwa lihengo lya kila lichiko.

²² Naha ndi chi kwa Chapanga. Apata kulangii lilaka lyake na makakala ghake. Nambo akabhahimbilile hake bhando bhala bhuhapata bhahadabulwe na lilaka lyake, bheniya ndi bhibhatopila kukomelekelwa.

²³ Helahela apata kulangii ung'alicho gwake twe gwatujhitii twenga bhitupala kupoke kiya jhake, twenga akatulenganikiye kuhumii makacho tupoke ung'alicho gwake.

²⁴ Nhwalo twenga ndi bhitukemitwe, chi kuhumii pakate jha Akayahude tu, helahela kuhumii kwa bhando bha ilambo henge.

²⁵ Ngita chalonge Bhambo mukitabo cha Hocheya jwakibha nnondole jwa Chapanga, “Bhala bhuhhakibha, ‘Bhando bhango jhe,’ ‘Nanakema bhando bhango.’
Na jwenio, nanangiya upalo gwango mu ilambo hela yangambala.”

26 Na pala pabhalobholila, mangota bhando bhango jhe. Peniya nabhakemwa,

yana ya Chapanga jwabhii ghome.

27 Na Isaya jwakibha nnondole jwa Chapanga anonoha lilobhe kulonge, “Pamonga na ibheluko ya Akaichilahahele kubhehe twe ngita ncheke gwa kumbwane, bhando bhandina tu ndi bhibhapala kughombolelwa,

28 nhwalo, Bhambo natenda kajhombe kwahad-abuu bhando bhoha pannema.”

29 Ngita Isaya nnondole jwa Chapanga palongolila kulonge, “Bhambo jwabhii na makakala, nakutuleke jhe kibheluko cha Ichilahahele, bhoha ngatukomelekiye ngita bhando bhu ku Sodoma, na kwito ngakulandina ngita ku Gomola.”

Pauli abhajhope bhando bhu ku Ichilahahele

30 Ngohe bho, tulonge nike? Bhando bha ilambo henge bhakatehi jhe kilebhe kubhalangilwa bhaumbone palonge jha Chapanga, bhabhalangilwe bhaumbone palonge jhake kwa ndela jha kihobholelo,

31 nambo bhando bhu ku Ichilahahele bheniya bhakapalii lilaghalikilo lya kutendwa bhabhonekane bhaumbone palonge jha Chapanga nambo bhakabhonikine jhe bhaumbone palonge jha Chapanga.

32 Nhwalo gwa nike bhakabhonikii jhe bhaumbone palonge jha Chapanga? Nhwalo bhakahobholii itendwa yabhe, bhakauhobhole jhe kihobholelo. Yene, “Bhajhakukochokana mu lighanga lya kukobhondokela.”

33 Ngita chighalonge Majhandiko gha Chapanga,
“Dolekeya, nameka lighanga kwenio ku Sayune,
na lyenio ndi nalyantenda bhando bhakobhondoke.
Mekite lighanga lilipala kwatenda bhando bhagweghe.
Nambo mundo jhojhoha jwapala kunhobholela nakola ng’o hone.”

10

¹ Makalongo bhango, mwojho gwango upala hake na ninnyopa Chapanga, Akayahude ajhango bhaghombolwe.

² Nhwalo nihoto kulonge hotuhotu kubhehe bhakibhohite mu kumpalaha Chapanga, nambo chi kwa kumanya Chapanga kwa umbone.

³ Nhwalo bhaumanyite jhe Chapanga chabhabhalangila bhando bhabha bhaumbone palonge jhake, bhajhighite kutumbulicha ndela yabhe bhene na bhaikanite ndela jha Chapanga jwabhabhalangila bhando bhabha bhaumbone palonge jhake.

⁴ Nhwalo kwa Kilichitu ndi ukamalicho gwa lilaghalikilo, bhoha bhubbannyeketela bhabhalangilwe bhaumbone palonge jha Chapanga.

Ughombokeko kwa bhando bhoha

⁵ Mucha akajhandike naha kwa lilobhe lya kujheketelwa na Chapanga kwa kupete kuka-muu Lilaghalikilo, “Mundo jhojhoha jwaikamuu lilaghalikilo nabha ghome kwa kupete Lilaghalikilo lyenio.”

⁶ Nambo kwa lilobhe lya kujheketelwa na Chapanga kwa ndela jha kihobholelo ilonge naha, “Nkotoka kuwachila kumwojho gwino, bho, ndi ghane nahobhoka ade kunane kwa Chapanga kunhuluwa Kilichitu pahe atukombole?”

⁷ Hilu nkotoka kulonge, “Bho, ghane nahuluka panane jha kilichitu ku kilambo cha bhando bhibhawile ahike kutughombola?”

⁸ Nhwalo kujheketelwa palonge jha Chapanga kwa ndela jha kihobholelo kilonge bhole, “Lilobhe lya Chapanga libhii pahina na mwenga, libhii munomo gwino na libhii kumwojho gwino.” Chene ndi chela chitutangacha bhando panane jha kihobholelo.

⁹ Anda nnyeketile kwa nnomo gwino kubhehe Yecho ndi Bhambo na kunyeketela kuumii kumwojho gwino kubhehe Chapanga akayokiche kuumii kubhawile, ndi nang'ombokoka.

¹⁰ Kwa nhwalo kwa mwojho mundo ujheketila, Chapanga amalangila jwamaha palonge jhake, na jwenio pajheketila kihobholelo kwa nnomo gwake ughombokoka.

¹¹ Ngita chighalonge Majhandiko gha Chapanga, “Kila mundo jwanyeketela nakola ng'o hone.”

¹² Nilonge lende kwa kila mundo, nhwalo kibhii jhe chikilekenile kwa Akayahude na bhando bha ilambo henge, nhwalo Chapanga ndi Bhambo jhola jwa bhando bhoha na jwaumbone kwa bhando bhibhannyopa.

¹³ Nhwalo Majhandiko gha Chapanga ghilonge, “Kila mundo jwajhopa kwa liina lya Bhambo, naghombolelwa.”

¹⁴ Ngohe nabhanyopa bhole jhola jwanganhobholela? Bho, kabhele nabhahobholela bhole kone bhinawahi jhe kujhoha malobhe ghake? Nabhajhoha bhole malobhe ghake nakubhehe jhe mundo jwakwatangachila?

¹⁵ Bho, bhando nabhatangacha bhole Lilobhe lya Mbone nakutumwa jhe? Ngita chighalonge Majhandiko gha Chapanga, “Dolekeya chihalalile magholo gha bhala bhibhatangacha Malobhe gha Mbone!”

¹⁶ Nambo chi Akaichilahele bhoha bhakajheketii ndeka malobhe gheniya gha Mbone. Nhwalo Isaya jwakibha nnondole jwa Chapanga akalongile, “Bhambo, ghane ade akalijheketile lilobhe lito?”

¹⁷ Bhahe, kihobholelo kipitii kwa kujhoha lilobhe, na lyenio lilobhe lihika kwa lilobhe lya Kilichitu.

¹⁸ Nambo nikonya, bho, mu kalijhohine lilobhe lyenio? Chakaka, kujhoha bhakajhohine ngita chighalonge Majhandiko gha Chapanga, “Lilobhe lijhokanikike pannema ghoha, malobhe ghabhe ghapehikiye ade imbokotole yoha ya nnema.”

¹⁹ Nikonya kabhele, bho, bhando bhu ku Ichilahele bhaghamanyite jhe malobhe gheniya? Chapanga akalongalile kulonge kupete Mucha, “Nanatenda bhamone wiho kupete, bhando bha ilambo henge. Nanitenda mme na lilaka, bhando bhangamanya.”

²⁰ Nambo Isaya changajhoghopa ilonge, “Monekine kwa bhando bhala bhangambalaha,

nikilangii kwa bhando bhangangonya malobhe ghango.”

²¹ Nambo panane jha Ichilahele, Chapanga ilonge, “Muhe jhoha nikahatambulile mabhoko ghango kwakema bhando bhina lighoho na bhanganyokanikiya.”

11

Chapanga abhabhone kiya bhando bhu ku Ichilahele

¹ Ngohe nikonya bho, Chapanga abhakanite bhando bhake? Nahi jhe abhakanite jhe! Ne namwete ndi Mwichilahele, kibheluko cha Ulahimo, nihumii mu likabila Iya Benjamine.

² Chapanga abhakanite jhe bhando bhake bhabhahagwii kutumbulii makacho. Bho, umanye jhe chighalonge Majhandiko gha Chapanga pala Eliya pannelila Chapanga kwa uhakaho gwa aka Ichilahele? Jwenio akalongii,

³ “Bhambo, akakomite milondole bhino na kutilulana njangwale ya matambiko hino. Na nenga ighilile kanjika ndo, na bhene bhapala kungoma.”

⁴ Bho, Chapanga akajhangite kilebhe ghane? Akannongolile, “Nikebhekii bhando elufo chaba bhibhakanite kutama makilikite palonge jha kinyagho Baale.”

⁵ Naha ndi chibhii ngohe, bhabhii bhando bhandina bhibhahaghulilwe kwa umbone gwa jhajhe gwa Chapanga.

⁶ Bhakahaghulilwe kwa ndela jhaumbone gwa jhajhe gwake Chapanga, chi kwa ghala ghubhatehila. Nhwalo ngita Chapanga ihaghuu kwa ku-

lolekeya mahengo gha bhando umbone gwake gwa jhajhe ngaubhii kilebhe nacho.

⁷ Ngohe nike? Bhando bhu ku Ichilachele chela chibhapaliya bhakapatite jhe, nambo bhala bhibhakahaghulilwe na Chapanga bhakapatite. Na bhange bhakibha na lighoho.

⁸ Ngita chighalonge Majhandiko gha Chapanga, “Chapanga atehi miojho jhabhe kujhundupa, ade deleno jheno bhahoto jhe kulola kwa miho ghabhe, amu kujhoha kwa machikilo ghabhe.”

⁹ Na Daude helahela alonge, “Minyagho jhabhe ighalambuke na kubhehe ntambo gwa kwajhonja, bhagweghe na bhahadabulwe.

¹⁰ Miho ghabhe ghalekwii lubhendo ghahoto jhe kulola.

Mighongo jhabhe ipendike machiko ghoha!”

¹¹ Bhahe, nikonya kabhele, bho, Akayahude bhakobhondwike ade kukomelekeya njwe? Na pandina jhe! Nambo kulemwa kwabhe ughombokeko gwajhendilile bhando bha ilambo yoha, na Akayahude bhakole wiho.

¹² Ulemo gwa Akayahude gwaletii mota bhando bha nnema, na kupongokewa kwabhe kwa kihobholelo kwatehi bhando bha ilambo henge bhabha na mota. Bhahe, ndi chakaka kubhehe Akayahude bhoha anda bhang'alambukiye Chapanga mota naijhonjekeka hake.

Ughombokeko gwa bhando bha ilambo henge

¹³ Ngohe nilonge na mangota bhando bha ilambo henge, kwa nhwalo nenga natenga kwa bhando bha ilambo, niloke lihengo lyango.

¹⁴ Hote kwatenda bhando bhango Akayahude bhakole wiho, nihoto kwaghombola bhange pakate jhabhe.

¹⁵ Nhwalo anda kukanilwa kwabhe Akayahude kukajhambukii bhando bhoha bhabha bhajhelenichwe nde na Chapanga, nahibha bhole pala pubhajheketelwa na Chapanga? Naubhaha ughome kwa bhando bhubhakibha bhawile kihuke!

¹⁶ Anda kipande chukutumbuu cha libumunda likapihitwe palonge jha Chapanga, libumunda lyoha lipihitwe palonge jhake Chapanga. Anda mikegha jha nkongo ibhii jhaumbone, helahela mandabhe ghake ubhehe ghaumbone hele.

¹⁷ Nambo anda ghabhii mandabhe gha Micheitune gwambone gwa kupandwa uhekitwe, na mangota bhumii ncheitune gwa kumanyahe nnombine pamba. Na mangota bhando bha ilambo henge ndi nnandine na lindabhe lya ncheitune gwa kumanyahe, yenio ngohe ntumii likakala lya ncheitune gwambone gwa kupandwa.

¹⁸ Bhahe, nkotoka kwapuucha bhala Akaichilafele bhubhahekuite ngita mandabhe! Bho, ngohe nahotola bhole mangota mabhando bha ilambo henge kukiloka? Nkomboke kubhehe mangota ndi mandabhe tugha, mangota mikegha jhe, nambo mikegha ndi jhijhintangatila mangota.

¹⁹ Nambo mwenga nanongela, “Mandabhe ghala ghahekitwe twenga tulombonechwe chehemo jhake.”

²⁰ Chakaka, gheniya chakaka. Ghahekitwe kwa nhwalo gwangakihobholelo, nambo mwenga

nnyemite kwa nhwalo mijheketela. Ngohe, mwangalokela, nambo nnyoghope.

²¹ Nhwalo anda Chapanga akalekekii jhe Akayahude bhuhhakibha anda mandabhe gha lihembuko, bho, pumihambuka Chapanga nanekekeya mangota?

²² Bhahe, dola umbone gwa Chapanga na lilaka lyake. Jwenio ulakala kwa bhala bhangajhokanikiya, na jwaumbone kwino mwenga anda nanyendelela kutama muumbone gwake, anda nahijhe, na mangota hele nauheketwa.

²³ Na bhene Akayahude anda changatama changahobholela kwabhe, nabhapandikichwa kabhele chehemo jhene jhibhahekite. Nhwalo Chapanga abhii na ukindendeke gwa kwapandikicha kabhele.

²⁴ Mangota bhando bha ilambo henge, milandana na mandabhe gha ncheitune gwa kumanyahe. Mukabhohitwe kwenio na kupandikichwa ku ncheitune gwa kung'onda chehemo jhabhe ndeka. Nambo Akayahude bhilandana na ncheitune gwa kung'onda. Nakibhaha kilebhe kijhojhoho kupandikichwa munkongo gwabhe bhene.

Chapanga abhabhone kiya bhando bhoha

²⁵ Makalongo bhango, mbala jhe nkoto kumanya chile jhenje, pange mihoto kukiwacha nkwete malango hake, lighoho lya Akaichilahele likibha kwa kipinde chandina tugha, ade bhando twe bha ilambo yoha pubhapala kung'alambukila Chapanga.

²⁶ Peniya ndi Akaichilahele bhoha nabhaghombolelwa, ngita chighalonge Majhandiko gha Chapanga,

“Nkomboche nahika kuhumii ku Chayune, nabhoa ghangandanela ghoha mukibheluko cha Yakobu.

²⁷ Lende ndi lilaghano limbala kuhenga nabho pumbala kwabhokeha uhakaho gwabhe.”

²⁸ Nhwalo Akayahude bhalikana Lilobhe Iya Mbone, bhayokite makoko bha Chapanga kwa kujhambulila kwino mangota bhando bha ilambo henge. Nambo nhwalo bhahaghulilwe na Chapanga, bhamela bhupalwa na Chapanga kwa nhwalo gwa akahoko bhabhe.

²⁹ Bhahe, Chapanga aghambula jhe malango panane jha jwahagwii na jwampekii mota.

³⁰ Makacho mangota mkanekite kunnyokanikiya Chapanga, nambo ngoheno mangota mpatite kiya jhake kwa kukana kwabhe Akayahude kunnyokanikiya Chapanga.

³¹ Helahela ngita mangota chimpokile kiya jha Chapanga, Akayahude bhikana kunnyokanikiya Chapanga, na bhahoto kupoke kiya jha Chapanga.

³² Nhwalo Chapanga abhatehi bhando bhoha bhakoto kunnyokanikiya kupala abhabhone kiya bhoha.

Tunnombe Chapanga

³³ Ulohe gwa Chapanga chiubhii gwa kungacha! Na malango ghake chighabhii makolongwa! Na kumanya kwake chukubhii kulongwa. Bho, ghane jwahoto kumanya chahadabula? Bho, ghane jwahoto kuhumbuu ndela jhake?

34 Ngita chighalonge Majhandiko gha Chapanga,

“Bho, ghane jwahoto kumanya chawacha Bhambo?

Bho, ghane jwahoto kunnobholela ahenge?

35 Bho, ghane jwalongolile kumpela kilebhe, na peniya Chapanga annepe?”

36 Nhwalo ilebhe yoha ihuma kwa jwenio, ibhii kwa ukindendeke gwake na kwa nhwalo gwake. Ung'alicho ubhehe kwa jwenio Chapanga machiko ghoha ghangapeta! Amina.

12

Ughome mukutumikii Chapanga

1 Yene, makalongo bhango, nhwalo Chapanga ndi jwabhii na kiya twe, chonde mpiye yegha jhino ngita litambiko lilibhii na ughome nyahinyahi na lina kuhalala kwa Chapanga. Jhenje ndi ndela jha uchakaka jha kunyinamii Chapanga.

2 Nkoto kughakengama mambu gha nnema ghongo, nambo munneke Chapanga aghalam-buye malango ghino. Peniya ndi naumanya upalo gwa Chapanga na kubangatuka kilebhe chikibhii mbone, lilihanganicha na lilikamilike.

3 Kwa umbone gwa jhajhe gwambekii Chapanga, ninobholela mangota mabhoha, mundo akotoka kukiwacha jwamaha kuliku chabhile. Nambo mukilolekeye mabhene ngita Chapanga chamaghulile kila mundo kihobholelo chake.

4 Nhwalo muyegha ibhii na ihungo mbwee, nambo kila chimo kibhii na lihengo lyake.

⁵ Helahela twenga pamo na kubhehe twe, tubhii yegha jhimo kwa kulombana na Kilichitu, na kila mundo ndi kihungo cha nnyake.

⁶ Tubhii na hupo yangalandana kupete umbone gwa jhajhe gwatupekii Chapanga. Mundo anda apekiwe hupo jha ulondole gwa Chapanga abhohe ulondole kwa kihobholelo chake.

⁷ Mundo jwapatite hupo jha kwahenge ajhake munneke abhahengele anda kubhola munneke abhole.

⁸ Na mundo jwapatite hupo jha kupepecha na jwenio ahenge yenio, na helahela jwapatite hupo jha kwapela ajhake ilebhe, abhohe kwa mwojho ghoha. Jwajhemelela bhando bhange, ajhemelela kwa uchakaka. Na jwapatite hupo jha kiya ahenge hele kwa kuhangana.

⁹ Upalo gwino ukotoka kubhehe gwa kukolohana. Mulichimwe lyolyoha libhoho, na mulichokolekeye lyambone.

¹⁰ Mpalane hake mabhene kwa mabhene ngita makalongo, kila jhumo anyokanikiya nnyake.

¹¹ Nkoto kubhehe mwatotoo mukunhenge Bhambo, nhengele kwa mwojho gwino gwoha.

¹² Lihobholelo lino lintende nhangane, na nhimbilila mu malagho, na mpipikiye mukunyopa Chapanga.

¹³ Matangatila bhando bha Chapanga kwa ghala ghibhapala, na mwapokele akaghene kwa umbone.

¹⁴ Majhopela mota bhala bhoha bhibhang'aha, majhope mota mangalapanikii jhe.

¹⁵ Nhwangane na bhala bhibhahangana nnele na bhala bhibhalela.

¹⁶ Ntame kwa kujhelana mabhene kwa mabhene. Nkotoka kuloka, nambo nnyeketele kutama na akahocho. Nkotoka kubhehe mundo jwakitenda jhuna malango hake.

¹⁷ Nkotoka kulepana ubhoho kwa ubhoho. Ngahaghe kuhenga ghughabhii ghambone palonge jha bhando bhoha.

¹⁸ Nghaghe kutama kwa uteeke na bhando bhoha.

¹⁹ Akakoche bhango, nkotoka kulepechela libhoho kwa libhoho, munekele Chapanga lijhambu lyenio, nhwalo Majhandiko gha Chapanga ghilonge, Bhambo alonge “Nenga nanepechela bheniya, ndi lihengo lyango, nenga nanepa.”

²⁰ Nambo ngita Majhandiko gha Chapanga chighalonge, “Likoko abhii na njala, mwenga mupela chakulyegha, anda abhii na nyota, mwenga mupela mache anyweghe. Kwa kutenda yenio, namutenda abhaha na hone.”

²¹ Nkotoka kujheketela ubhoho unepelele, nambo mughahotole mabhoho kwa kuhenga ghambone.

13

Kwajhokaniya bhibhabhii na ukindendeke

¹ Mundo jhojhoha ipalwa kwajhokanikiya bhibhabhii na ukindendeke, nhwalo abhii jhe mundo jwahoto kulongocha anda Chapanga amekite jhe alongoche, Chapanga tu ndi jwabhapeke ilongoche likakala lya kulongocha.

² Jhola jwakana ukindendeke, jwenio haikana mihilo jha Chapanga, na bhene bhibhatenda naha nabhahadabulwa.

³ Nhwalo bhibhatenda ghamaha bhapwelela ndeka bhibhalongocha, nambo kwa bhando bhala bhibhatenda ghangandela. Bho, mipala kutama changanyoghopa jwabhi na ukindendeke? Bhahe, uhenge ghambone na jwenio nanumbilila,

⁴ jwenio ndi atumikii Chapanga jawahenga li-hengo kwa nhwalo gwino. Nambo anda ntei mabhoho, mipalwa kunyoghopa, nhwalo chakaka abhi na ukindendeke gwa kuhadabula. Jwenio ntumiche jwa Chapanga, na ulangii lilaka lya Chapanga kwa bhala bhibhahenga mabhoho.

⁵ Kwa nhwalo ghongone ipalwa kwajhokanikiya bhibhabhi na ukindendeke, chi tughu nhwalo gwa kujhoghopa kuhadabulwa na Chapanga, nambo nhwalo umanye chikipalwa kuhenga.

⁶ Kwa nhwalo ghogho gwenio mangota milepa kode, nhwalo bheniya uhengela Chapanga na machiko ghoha bhakipiya kwa nhwalo jha li-hengo lyenio.

⁷ Yene mupele kila mundo chela chikipalwa apelwe, mundo jwa kode, munepe kode jhake, jwapala kujhoghopwa, munyoghope.

Kupalana kilukolo

⁸ Nkotoka kubhehe na lighambo kwa mundo jhohoha, lighambo lino libhaha lya kupalana tu. Chakaka mundo jwampala nnyake alikamwii lilaghalikilo.

⁹ Kwa nhwalo mihilo jhenje, “Nkotoka kumtenda ngongola na nkotoka kukoma na nkotoka kujhibha na nkotoka kubhehe noghinoghi na ajhino.” Na mihilo jhoha, ubhii nhwilo ghongo ghumo, “Mupale nnyino ngita chimukipala mabhene.”

¹⁰ Mundo jwapala nnyake ahoto jhe kuntende mabhoho. Yene, kupalana ndi kutimicha Lilaghalikilo lyoha.

¹¹ Nhenga naha, nhwalo umanye kwa mangota kipinde cha kung'anga'anuka kuumii mulugwenio kihikite, kwa nhwalo ughombokeko gwino ubhandikile kuliku machiko ghala pitumbwila kuhobholela.

¹² Uhiko ubhandikii kujhomokela na muhe ibhandikii kujhingii. Yene, tughaleke kuhenga gha mulubhendo, na tuhenge mambu gha pakongoloho.

¹³ Tutame kwa malango ngita bhando bhitutama mu lumule lwa muhe, chi kwa uloho amu ulobhelo, na chi kwa ubhoho na ngongola hilu bhulo na wiho.

¹⁴ Nambo nnombane na Bhambo Yecho Kili-chitu, peniya nkotoka kukengama yegha hino na kuhenga tama jha uhakaho.

14

Nkotoka kunhadabuu nnyino

¹ Mupokele jhola jwabhii na kihobholelo chandina, nkotoka kutaungana na uhotolo ghake.

² Mundo jhomo kihobholelo chake ipala kulye kila chakibhona, nambo mundo jhonge kihobholelo chake chandina alye mandebhele tu.

³ Mundo jhola jwalye kilebhe chochoha akotoka kumpucha jhola jwangalyegha kila kilebhe. Hela-hela jhola jwahola ilebhe ya kulyegha akotoka kuhadabula jhola jwalyegha kila kilebhe, nhwalo Chapanga annyeketile.

⁴ Bho, mwe maghane jhumhadabuu ntumiche jwa mundo jhonge? Anda ajhemite amu agwile lyenio lihengo lya munahota gwake, nahema nganganga, nhwalo Bhambo nahotola kunyemeka.

⁵ Mundo jhonge ihola lichiko lya kiteni litopii hake kuliku lichiko lenge, nambo bhangе bhihola machiko ghoha ghabhii lengalenga. Kila mundo akola uchakaka na chela chakiwachila.

⁶ Jhola jwalola lichiko lya kiteni litopile, atenda yenio kwa kunnomba Chapanga. Jhola jwalye kilebhe chochoha, na jwenio itenda yenio kwa kunnomba Bhambo, nhwalo bhichenguu Chapanga kwa chakulya chabhapekii. Jhola jwahola pakate jha kulyegha, jwenio helahela itenda yenio kwa kunnomba Bhambo, na jwenio helahela ichenguu Chapanga.

⁷ Nhwalo abhii jhe hilu mundo pakate jhito jwahoto kulama kwa nhwalo gwake jwenio. Amu jwawegha kwa nhwalo gwake jwenio.

⁸ Kwa nhwalo tubhehe ghome, tutama kwa nhwalo jha Bhambo, na anda tuwegha, tuwegha kwa nhwalo gwa Bhambo. Yene anda tulama amu tuwile, twenga tu bhando bha Bhambo.

⁹ Nhwalo Kilichitu akawile na kuyoka abhehe Bhambo jwa bhibhabhii ghome na bhibhawile.

¹⁰ Ngohe nhwalo ghane muhadabuu nnyino? Na mwe nhwalo ghane mupuucha nnyino?

Nambo twenga twabhoha natujhema palonge jha kigoda cha Chapanga cha luhadabulo.

¹¹ Nhwalo Majhandiko gha Chapanga ghilonge. Ilonge Bhambo, “Nilapii kwa liina lyango, nenga ndi Chapanga ngita chinitama, kila mundo nandamila makilikite, kila jhumo najheketela kubhehe nenga ndi Chapanga.”

¹² Yene kila mundo pakate jhito nakikengelela jwenio palonge jha Chapanga.

Nkotoka kubhehe kingobhahe kwa nnyino ahenge uhakaho

¹³ Yene, tuleke kuhadabulana twabhete kwa twabhete. Nambo mukilolekeye mundo jhojhoha akoto kubhehe kingobhahe chochoha chikihoto kuntenda nnongo mundo agweghe mu uhakaho.

¹⁴ Nenga jhunombine na Bhambo Yecho, nimanya chakaka kibhii jhe kilebhe chikibhalangilwa kukanwa kujheketelwa kwa nhwalo gwa lihembukilo lyake. Nambo anda mundo kulonge kilebhe cha kiteni ndi kihakanaho bhahe, chenye ndi kihakanaho kwa jwenio.

¹⁵ Anda mutei nnongo gwino abhehe ngolongondi, anda mutei abhehe na kinyela kwa chakulya chimulye, bhahe, mwe nkwetii jhe upalo. Chakulya chimulyegha kikoto kunhobheya nnongo gwino, Kilichitu akahwii kwa nhwalo gwake!

¹⁶ Bhahe, nkotoka kujheketela kilebhe chambone chimukibhona kwino kipuuchwe.

¹⁷ Nhwalo Unahota gwa Chapanga chi kilebhe cha kulyegha na kunywegha, nambo kubhalangilwa ghaumbone palonge jha Chapanga uteeke na kughanganila ghighaletwa na Uhuke gwa Chapanga.

¹⁸ Mundo jhojhoha jwahengela Kilichitu naha, anhalalicha Chapanga, na jwenio najheketelwa palonge jha bhando.

¹⁹ Bhahe, mbaha tujhendelele kwa kuhenga ghambone ghighaleta uteeke na ghighatutanganatila kuchengana mu kihobholelo.

²⁰ Nkotoka kuhangabhana lihengo lya Chapanga kwa nhwalo jha kutaungana yakulyegha. Yakulye yoha ndi yamaha, nambo yamaha jhe mundo jhojhoha kuntenda kingobhahe nnongo mundo ajhingii mu uhakaho.

²¹ Mbaha kuleka kulye nyama, amu kunywegha divaye, na kukihibilikiya kuhenga kilebhe chochoha chikihoto kuntenda nnongo gwino agwelele mu uhakaho.

²² Bhahe, nchokolekeye chimukihobholela pakate jhino na Chapanga gwino. Mbaha mundo jhola jwangakihadabula kwa nhwalo gwake jwenio kwa chela chiwachila tela.

²³ Nambo mundo jhola jwabhehe na kiholo kwa chakulya, anda alile Chapanga nahadabula, nhwalo alii ndeka ngita chikipala kihobholelo chake. Na kilebhe chochoha chakihenga mundo anda ahenga jhe kwa kihobholelo chake, gwenio ndi uhakaho.

Mwapale bhajhino na ntoka kukipala mabhene

¹ Twenga bhitukangamile mu kihobholelo itupala kwatangatila bhala bhibhabhii bheyabheya mu kihobholelo kughegha malola ghabhe. Tuko-toka kukipala tabhete tugha.

² Kila jhumo pakate jhito ipalwa ahuanganila nnyake kwa matyangilo ghambone ndi akangamaliche mukihobholelo.

³ Nhwalo Kilichitu akatumbwiihe kukipala jwenio, ngita chighalonge Majhandiko gha Chapanga, “Maligho ghoha ghibhanighita mwenga, ghahikii nenga.”

⁴ Bhahe, kwa ghoha ghighalongolila kujhandikwa mu Majhandiko gha Chapanga, ghajhandikwe kwa nhwalo jha kutubhola twenga, ndi kwa luhimba na kupepechwa na Majhandiko gheniya, tuhoto kubhehe na lihobholelo.

⁵ Chapanga jhuna luhimba na jwapepecha, abhaleke mwojho gwa kubhehe kilebhe chimo kwa kukengama ghatehila Yecho Kilichitu,

⁶ ndi, mabhoha mwenga mme kilebhe chimo na lilobhe limo, lya kunomba Chapanga, Tate gwa Bhambo gwito Yecho Kilichitu.

Lilobhe lya Mbone kwa bhando bhoha

⁷ Bhahe, mu pokelane mabhene kwa mabhene ngita Kilichitu champokii mangota, ndi Chapanga alombwe.

⁸ Nhwalo nilonge kubhehe, Kilichitu akabhahengii Akayahude apata kulangii uchakaka gwa Chapanga, na kulenganikiya malaghano gha

Chapanga ghabhapekiya akahoko bhito ibhehe telatela,

⁹ na ata bhando bhamba bha ilambo yoha bhanombe Chapanga kwa nhwalo jha kiya jhake. Ngita chighalonge Majhandiko gha Chapanga, “Kwa gheniya naninomba pakate jha bhando bha ilambo yoha.

Nanyemba kwa kunnomba mwenga.”

¹⁰ Helahela Majhandiko ghilonge,

“Unhanganile mangota bhando bha ilambo henge, unhanganile pamonga na bhando bhake!”

¹¹ Na kabhele Majhandiko gha Chapanga ghilonge

“Ma ilambo yoha, munombe Bhambo, mangota bhando bha ilambo henge,

munnombe Chapanga mangota bhando bhoha!”

¹² Kabhele Isaya jwakibha nnondole jwa Chapanga ilonge,

“Mu kibheluko cha Yeché napitila mundo, na jwenio nabhalongocha bhando bha ilambo, na bhando bha ilambo henge, natunhobholela jwenio.”

¹³ Bhahe, Chapanga jwabhii ndi nchingé gwa lihobholelo, antweleya luheko loha na uteeke kuumii mu kihobholelo chino, na lihobholelo lino lijhonjekeke kwa likakala lya Uhuke gwa Chapanga.

Lihengo lya Pauli

¹⁴ Makalongo bhango, namwete chakaka manye kubhehe mangota hele ntwelii umbone na umanye ghoha. Mihoto kubholana mabhene kwa mabhene.

¹⁵ Nambo ninyandikile baluwa jhenje ilebhe mbwe changabwaghaliya, nipala nikomboche kabhele. Ndehi naha kwa nhwalo jha umbone ghola gwambekii Chapanga,

¹⁶ jha kubhehe natumiche jwa Yecho Kilichitu kwa bhando bha ilambo henge. Nihenga lihengo lya Mupiya litambiko lya kutangacha Lilobhe lya Mbone lya Chapanga mbala bhando bha ilambo yoha bhabhehe matambiko ghighapokelelwa na Chapanga, matambiko jhijhelewilwe na Uhuke gwa Chapanga.

¹⁷ Nhwalo kwa kulombana na Kilichitu Yecho, nihoto kukilokela lihengo lyango ndi kwa nhwalo jha Chapanga.

¹⁸ Nilogwa jhe kujhonjekeya kulonge kilebhe chenge chochoha, ndi chela tugha kubhehe Kilichitu Yecho akatei kunduma, nenga mbata bhando bha ilambo yoha bhanyokanikihe Chapanga. Ateila naha kwa kulonge na kwa kuhenga,

¹⁹ kwa likakala lya ikangacho na nginyililo, na kwa likakala lya Uhuke gwa Chapanga. Bhahe, hotwi kujhenda, kuhumii ku Yeluchalemo ade ku Iluliko, kila chehemo, ndangiche maha Lilobhe lya Mbone lya Kilichitu.

²⁰ Chinipala namwete machiko ghoha ndangache Lilobhe lya Mbone popoha pala liina lya Kilichitu linajhokanikikajhe, ngotoka kuchenga nchinga gwa mundo jhonge.

²¹ Ngita hela chighalonge Majhandiko gha Chapanga,

“Bhando bhoha bhangelobholelwa malobhe ghake nabhalola,

na bhala bhanajho jhe malobhe ghake, nabha-jhoha.”

Pauli ipala kutyangii ku Loma

²² Ghono ndi nhwalo ghuhibhilikiya mala jhamahela nenga kuhika kwino.

²³ Nambo ngoheno nyomwile lihengo lyango mu ilambo yenio, na kabhele kuhumii yaka yamahele mbata kuhika kwino,

²⁴ nihobholela kuhenga lyenio ngoheno. Puni-pala kujhenda ku Chipaniya nambeta kuninga, peniya nipala mangota utangatile kuhika kwenio putujhomolela kuhangana na mangota kwa machiko ghandina.

²⁵ Nambo ngohe nijhenda ku Yeluchalemo kwa-hengela bhando bha Chapanga bhibhabhii kwenio.

²⁶ Nhwalo bhando bha likunde lilinyeketii Kilichitu Iya ku Makedoniya na Iya ku Akaya lihamwii kubhoha michango jha kwatangatila bhando bha Chapanga bhibhabhii akahocho bhibhabhii kwenio ku Yeluchalemo.

²⁷ Bhene bheniya bhakawe mbone kuhenga gheniya, na chakaka bhapalitwa kuhenga yenio. Nhwalo bhando bha ilambo henge bhakapokii mota ya kihuke kuhumii kwa Akayahude, na bhene hele bhapalwa hele kwabhaghulila ilebhe ya machiko ghoha.

²⁸ Bhahe, pumbala kujhomolela lihengo hele na kwahikichila ilebhe ichangwite kwa nhwalo gwabhe, nanityangila mangota pumbala kujhenda ku Chipaniya.

²⁹ Nimanya punihika kwino, nihika na mota mbwe ya Kilichitu.

³⁰ Bhahe, akalongo bhango, nimpembekeya Bhambo gwito Yecho Kilichitu na kwa upalo ghuletwa na Uhuke, tubhehe kilebhe chimo kwa mukunyope hake kwa Chapanga.

³¹ Unyopele kwa Chapanga moke njelembo pakate jha bhando bhangajheketela Kilichitu bhibhabhii ku Yudeya, na unyopele lihengo lyango ku kilambo cha ku Yeluchalemo lijheketelwe na bhando bha Chapanga bhibhabhii kwenio.

³² Bhahe, anda Chapanga apahile, nihoto kuhika kwino kwa luheko, na mbomolele pamo na mangota.

³³ Chapanga jwabhii lihembuko lya uteeke ab-haha na mangota mabhoha. Amina!

16

Pauli ijhambucha bhando bhu ku Loma

¹ Nipala mumanye nnombo gwito Foibe jwabhii ntumiche mu likunde lya bhando libhanyeketii Kilichitu lya ku Kenikuleya.

² Mupokele kwa liina lya Bhambo, ngita chimapoke bhando bha Chapanga. Mtangatile chochoha chela channyopa kuhumii kwino, nhwalo jwenio abhatangatii bhando twe na helahela andangatile na nenga.

³ Unyambuchile Pilisila na Akula, akahenga mahengo ajhango mu lihengo lya Kilichitu Yecho.

⁴ Bhene bhakibha mukuhandaanda jha kuwegha ne ng'ombokoke. Bhitope kuchengulilwa, chi kwa nenga kanjika, ata kwa likunde lya bhando bhibhanyeketii Kilichitu bha ilambo yoha bhinchengula.

⁵ Unyambuchila bhando bhibhanyeketii Kili-chitu bhibhakongana ukajhabhe.

Helahela unyambuchila nkoche gwango Epeneto jwatumbwila kunyeketela Kilichitu jwa kubomane jha ku Asiya.

⁶ Unyambuchila Maliya, jwakangamila kuhenga lihengo hake kwa nhwalo gwino.

⁷ Unyambuchila Anduloniko na Yuniya, Akayahude ajhango bhibhakatabhitwe mukipungo pamonga na nenga. Bhene bhakamanyikine hake pakate jha akatenga, kabhele bheniya bhakalongolile kunyeketela Kilichitu.

⁸ Unyambuchila Amupuliato, nkoche gwango jhunimpahii mukulombana na Bhambo.

⁹ Unyambuchila Alubano, nhenga lihengo nnyango jwa Kilichitu, na nkoche gwango jhunimpahii Sitaku.

¹⁰ Unyambuchila Apele, jwajhighanikilwe na kulangii jwenio kubhehe jwambone kwa Kili-chitu. Helahela unyambuchila bhando bhoha bhibhabhii ukajha mwa Alisitubulo.

¹¹ Unyambuchile nnongo gwango Helodiana na likunde lya bhando bhibhannyeketii Kilichitu bhibhabhii ukajha mwa Nalukisi.

¹² Unyambuchila Tulepeniya na Tulupona, akakeghe bhubhanhengila Bhambo. Helahela unyambuchila na nnombo gwango Pelise nkeghe jhonge jwanhengela hake Bhambo.

¹³ Unyambuchila Lupo, mundo jwanga-jhoghopa mulihengo lya Bhambo, pamo na majhe mundo, helahela jwakibha ngita majhe gwango.

¹⁴ Unyambulichila Asunikulito na Fulegone na Helime na Patuloba na Heluba na bhando bhoha bhibhabhii pamonga na bhene.

¹⁵ Unyambuchila Filologo na Yuliya na Nelaya na nnombo mundo, na Olimpa pamonga na bhando bhoha bha Chapanga bhibhabhii pamonga na bheniya.

¹⁶ Nnyambuchana mabhene kwa mabhene kwa nginyililo jha upalo. Bhando bhoha bhibhanyeketii Kilichitu, unyambuchila.

Malobhe gha kujhomolela

¹⁷ Makalongo bhango, nimpembelekeya mukilolekeye na bhala bhibhantenda mpechengane na kwatenda bhando bhange bhaleke mabhola ghubhapokii. Mukibhambahe na bhando bheniya,

¹⁸ nhwalo bhando ngita bheniya bhinhenge jhe Kilichitu Bhambo gwito, nambo bhaghahenge matumbo ghabhe bhene. Kwa malobhe ghabhe gha kunoghe na gha kukihutila kumwojho bhakopekeya bhando bhangalemwa.

¹⁹ Nhwalo mangota umanyikana kwa bhando bhoha kwa kunnyokanikii Bhambo, yenio nihangana kwa nhwalo gwino. Nimpalangana mme na malango kwa kuhenga ghambone na mme nkwete jhe ulemo mu kuhenga ghanganandela.

²⁰ Chapanga jwabhii lihembuko lya uteeke nabhe jhe na kiyoto kukinya Limbembela pahe jha magholo ghino.

Umbone gwa jhajhe gwa Bhambo gwito Yecho Kilichitu ubhaha na mangota.

²¹ Timocheyo, nhenga lihengo nnyango, anyambucha. Helahela nnongo gwango Lukiyo na Yasoni na Sosipateli, akajhango bhinyambucha.

²² Na nenga Telitiyo, jhuninnyandikila Pauli baluwa jhenje, ninyambucha kwa liina lya Bhambo.

²³ Gayo jhunihihilile, pamonga na likunde lya bhando bhoha bhibhanyeketii Kilichitu bhibhakongana kajhake, anyambucha. Elasito jwabhekita kihukilo cha mbijha cha mucho ghongo, pamonga na nnongo gwito Kwalito, bhinyambucha.

²⁴ Umbone gwa jhajhe gwa Bhambo gwito Yecho ubhaha na mangota mabhoha. Amina.

Pauli innomba Chapanga

²⁵ Bhahe, ngoheno tunnomba Chapanga jwahotola kukangamalicha mu Lilobhe lela lya Mbone linongila Yecho Kilichitu, na mu kiyepela kwa jhiyekulilwe na jhikibha ihitwe kwa yaka twe ipetite.

²⁶ Nambo ngoheno uchakaka ndi gwenio uyekulilwe kwa ndela jha majhandiko gha akalondole bha Chapanga, na kwa mihilo jha Chapanga jha machiko ghoha ghangapeta kwa bhando bhoha bha nnema bhahoto kuhobholela na kujheketela.

²⁷ Kwa Chapanga jwabhii kanjika jhuna malango, abhaha na ung'alicho kwa ndela jha Yecho kilichitu machiko ghoha ghangapeta. Amina.

Ndendeule

Ndendeule: Ndendeule (New Testament) for Tanzania

copyright © 2020 The Word for the World International

Language: (Ndendeule)

Contributor: The Word for the World International

The New Testament in Ndendeule Language.

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

463e1ded-27ea-5916-a8ed-170cdb8d87e3